

786 eligantur, et non de adulterio vel incaestu procreati: quia sicut nostris temporibus ad sacerdotium secundum canones adulter pervenire non potest, sic nec christus Domini esse valet, et rex totius regni, et heres patrię, qui ex legitimo non fuerit connubio generatus, dicente propheta: 'Scitote, quia Dominus dominator est in regno hominum, et ipsius est regnum: et cuicunque voluerit, dabit illud'. Ideo omnes generaliter admonuimus, ut consona voce et corde Dominum rogent, ut qui eligit eum in regnum, ipse ei tribuat regimen disciplinae sanctae suae, ad regendam plebem suam. Honor quoque eis ab omnibus impendatur, dicente apostolo: 'Regem honorificate', et alibi: 'Sive regi quasi praecellenti, sive ducibus tanquam ab eo missis, ad vindictam malefactorum, laudem vero bonorum'. Item apostolus: 'Omnis anima sublimioribus potestatibus subdita sit, quia non est potestas data nisi a Deo. Quae autem a Deo sunt, ordinata sunt. Igitur qui resistit potestati, Dei ordinationi resistit: qui autem resistunt, ipsi sibi damnationem acquirunt'. Nullus regi detrahat, dicente Salomone: 'In ore tuo ne detraxeris regi, et in corde tuo ne maledixeris principi, quia aves caeli portant illud, et qui habet pennas annunciabit verbum'. In necem regis nemo communicare audeat, quia christus Domini est: et si quis tali sceleri adhaeserit, si episcopus est, aut ullus ex sacerdotali gradu, ex ipso detrudatur, et a sancta hereditate deiciatur, sicut Iudas\* ab apostolico gradu eiectus est: et omnis quisquis tali sacrilegio assenserit, aeterno anathematis vinculo interibit, et Iudae traditori sociatus, sempiternis crematur incendiis, ut scriptum est: 'Non solum qui faciunt, sed et qui consentiunt facientibus, iudicium Dei non effugiunt'. Duo namque eunuchi Asuerum regem interficere cupientes, in patibulum suspensi sunt. Animadvertite, quid fecerit David praefecto, cum ei Dominus dixerit: Ego tradam Saul in manus tuas, dum invenit dormientem et hortatus a milite, ut occideret eum, dixit: 'Absit a me hoc peccatum, ut extendam manum meam in christum Domini'. Illum autem militem, qui post mortem eius venit ad eum, protestans quod ipse occiderit Saul, capite truncavit: et reputatum est illi ad iusticiam, et semini eius post eum. Exemplis namque apud vos saepe probatum est, quod quicunque internecionis dominorum causa fuere, in spacio vitam finierunt et utroque iure caruerunt.

XIII. Decima tertia admonitio fuit, ut potentes et divites iusta iudicia statuunt, nec personam divitis accipiant, nec pauperes contemnant, neque a rectitudine iudiciorum deviant, nec munera super innocentes accipiant, sed in veritate et iusticia dicente propheta: 'Iuste iudicate, filii hominum'. Item alibi: 'Non facies quod iniquum est, nec iniuste iudicabis; non stabis contra sanguinem proximi tui'. Item ait Esaias: 'Querite iudicium, subvenite oppresso, iudicate pupillo, defendite viduam, et venite et arguite me, dicit Dominus. Si fuerint peccata vestra ut coccinum, quasi nix dealbabitur: si fuerint rubra quasi vermiculus, ut lana alba erunt'. Item alibi: 'Solve omnem nodum iniquitatis, solve fasciculos deprimentes: dimitte eos, qui confracti sunt, liberos, et omne onus disrumpe'. 'Tunc erumpet quasi mane lumen tuum et sanitas tua citius orietur', dicente Domino in evangelio: 'In quo etiam iudicio iudicaveritis, iudicabimini; mensura, qua mensi fueritis, metietur vobis'. Nec vi alicui rapietis quod suum est, ut dictum est: 'Non concupisces rem proximi tui, nec desiderabis uxorem eius, non villam, non bovem, non ovem, non agrum, nec omnia quae illius sunt'. Propheta namque comminatur dicens: 'Vae qui coniungitis domum ad domum, et agrum ad agrum copulatis, usque ad terminum loci: nunquid soli vos habitabitis in medio terrae? in auribus meis sunt haec, dicit Dominus exercituum'. Rursum clamat propheta dicens: 'Eripite pauperem et egenum de manu peccatoris liberate'. Memen- tote quid mereatur, qui scandalizaverit unum de pusillis: qui autem suscepit unum de his, Christum suscipit, a quo in iudicio mereamini audire: 'Venite benedicti,\* possidere paratum vobis regnum ab origine mundi'.